

Chwythu balwnau – Y Pentecost (Y Sulgwyn)

Cysyniadau: **Gwerthfawrogi, cefnogi a chalonogi.**

Amcan: **Pwysigrwydd calonogi a chefnogi.**

Cyfarpar: **Tair neu bedair balŵn.**

Cyflwyniad:

● Cyfeirio at ddau neu dri o'r plant sydd wedi gwneud yn dda yn ystod yr wythnos, e.e. tystysgrif am nofio, sgorio gôl i'r tîm, wedi helpu rhywun. Canmol a dangos cymeradwyaeth gan yr ysgol gyfan.

● Dangos un balŵn (heb ei chwythu) – mor llipa mae'n edrych. Byddai tipyn o galondid yn help. Dechrau chwythu'r balŵn. Mae'r balŵn yn cymryd siâp wrth ei llenwi ag aer. Ninnau 'run fath, mae tipyn o gefnogaeth yn gymorth i ni fagu hyder. Mae dweud 'da iawn' yn bwysig.

● Annog y plant i feddwl am eiriau ac ymadroddion sy'n rhoi hyder i ni, e.e. 'da iawn', 'ardderchog', 'bendigedig', 'grêt', 'paid â phoeni', 'un cyfle eto', 'cynnig ardderchog', 'paid â bod ofn', 'cynnig arall arni', 'mi ddo i efo ti', 'mi wnawn ni efo'n gilydd'.

● Ar ôl chwythu'r balŵn gyntaf, mynd ati i chwythu'r ail falŵn. Nid ni'n unig sydd angen cefnogaeth ond eraill hefyd. Sut medrwn ni gefnogi eraill? 'Dal ati', 'paid â diffygio', 'tro arall arni', 'mi wna i dy helpu di'.

● Atgoffa'r plant y gall geiriau a dywediadau negyddol fod yn niweidiol iawn, e.e. 'Dwyt ti'n da i ddim', 'Mi wyt ti'n stiwpid', 'Paid â bod mor wirion'.

- Gollwng ychydig o'r aer o'r balŵn a dweud bod angen i ni gefnogi a chalonogi ein gilydd. Dangos sut mae'r balŵn yn edrych pan fo'r aer wedi mynd ohoni.

Trafodaeth bellach:

- Egluro arwyddocâd y Pentecost neu'r Sulgwyn. Pentecost yn golygu 50 diwrnod ar ôl Gŵyl y Pasg. Roedd Iesu wedi addo y byddai ei ddisgyblion yn derbyn yr Ysbryd Glân sef yr un fyddai'n eu helpu a'u calonogi. A dyna ddigwyddodd. Daeth y disgyblion at ei gilydd ac fel hyn mae Luc yn dweud yr hanes:

Roedd Jerwsalem, y brifddinas, yn orlawn o bobl o bob rhan o'r byd. Roedden nhw yno ar gyfer gŵyl y Pentecost.

Roedd ffrindiau Iesu yn eistedd gyda'i gilydd mewn un ystafell pan, yn sydyn, daeth sŵn fel gwynt nerthol gan chwythu drwy'r ystafell a'i llenwi. Ymddangosodd fflamau o dân fel petaen nhw'n llosgi yn yr awyr, gan gyffwrdd â phob un oedd yno. Wrth i'r Ysbryd Glân gyffwrdd y bobl, dechreuodd pawb siarad mewn ieithoedd gwahanol.

Tyrrai pobl o bob cwr i weld beth oedd yn digwydd yn y tŷ.

'Beth sy'n digwydd?' gofynnodd un ohonyn nhw. 'Rydw i'n deall yn iawn beth mae'r bobl yma'n ei ddweud. Maen nhw'n siarad fy iaith i am Dduw. Sut mae hynny'n bosibl?'

'Wedi meddwi maen nhw!' crechwenai eraill.

'Na, dydyn ni ddim,' meddai Pedr, gan gamu ymlaen i siarad â'r bobl. 'Dim ond naw o'r gloch y bore ydi hi!' Safodd Pedr ar ei draed i egluro beth oedd yn digwydd.

Yn gyntaf, atgoffodd Pedr nhw o'r hyn roedd y proffwydi wedi'i ddweud am Iesu, amser maith yn ôl. Soniodd am Iesu, mab Duw, yr un oedd wedi'i ddewis gan Dduw, y Meseia. Pan soniodd Pedr sut cafodd Iesu ei ddal, ei guro ac yna'i ladd, roedd y bobl yn teimlo'n drist iawn.

'Beth fedrwn ni wneud?' gofynnodd rhai ohonyn nhw.

'Mae'n rhaid i chi roi'r gorau i'ch arferion drwg a chael eich bedyddio,' meddai Pedr. 'Os gwnewch chi hyn, bydd Duw yn maddau

i chi ac fe fyddwch yn derbyn yr Ysbryd Glân fel y gwnaethon ni.'

Y diwrnod hwnnw, daeth tair mil o bobl yn ddilynwyr newydd i Iesu. Bu'r apostolion wrthi'n brysur yn gwella pobl yn enw Iesu ac yn cyfarfod â ffrindiau eraill Iesu i addoli Duw, i weddio ac i rannu'r hyn oedd ganddyn nhw gyda'i gilydd. Beibl Lliw Stori Duw t. 278

Trafodaeth bellach:

● Mae ffrindiau Iesu yn derbyn nerth newydd. Mae'r Pentecost neu'r Sulgwyn yn ein hatgoffa o gychwyniad yr eglwys neu'r cynulliad newydd. Dyma ben-blwydd yr Eglwys Gristnogol.

● Mae ffrindiau Iesu yn cefnogi ei gilydd.

Maen nhw'n gweithio fel tîm:

- (i) Maen nhw'n cefnogi ei gilydd.
 - (ii) Maen nhw'n mwynhau bod efo'i gilydd.
 - (iii) Maen nhw'n rhannu popeth ymhlith ei gilydd.
 - (iv) Maen nhw'n dal ati efo'i gilydd.
 - (v) Maen nhw'n teimlo fel un teulu.
 - (vi) Maen nhw'n gweddio ac addoli efo'i gilydd.
- (Mae'r nodweddion hyn i'w gweld yn Actau 2: 42–47.)

Emyn: Rhaid bod 'na fwy na hyn: Canu Clod 360

Dyfyniad o'r Beibl:

Gras ein Harglwydd Iesu Grist, a chariad Duw, a chymdeithas yr Ysbryd Glân fyddo gyda chwi oll! 2 Corinthiaid 13:13 BCND

Munud i feddwl:

'Ni ddaw heddiw byth yn ôl. Cefnogwch rywun heddiw. Byddwch yn ffrind da i bawb.' 'Peidiwch â chwilio am feiau, chwiliwch am y gorau ym mhawb.'

Myfyrdod/Gweddi:

O Dad, wnei di'n helpu ni i gefnogi'r naill a'r llall a hynny er mwyn i ni dyfu'n hyderus a darganfod ein hunain o'r newydd? Amen.